



**ATASSUT**  
**Steen Lyngé**

**UPA2015/45**  
**05.05.2015.**

**Naalakkersuisut danskit naalagaaffiannik kiisalu danskit soraarnerussutisiaqalernissamut aningaasaateqarfiinik Kalaallit Nuna-annut aningaasaliisarfirmik aningaasaateqarfiliortoqarnissaa namminersorlutik oqartussanut soqutiginaateqarnera pillugu apeqquteqaat aallaavigalugu oqallinnissamik siunnersuut.**

**Aningaasaateqarfiliortoqarnissap anguniangarivaa siunissami inuussutissarsiornikkut suliassanut, ilaatigut aatsitassarsiornikkut, takornariaqarnermut, aalisarnermut, ataqatigiinnermullu aaqqissuussinermi suliassanut avataaniik aningaasaliisalernissaq.**

(Inatsisartunut ilaasortaq Justus Hansen, Demokraatit)

Atassut Inatsisartunut ilaasortap Justus Hansenip Demokraatinersup aningaasaliinissamut aningaasaateqarfimmik pilersitsinissaq pillugu oqallinnissaq siunertaralugu siunnersuutaanut imatut oqaaseqarumavoq.

Suliffissaaleqineq akiorumallugu suliffissanik pilersitsinissaq pisariqartipparput. Suliffissanik pilersitsinissarput pisariaqarpoq ajornanngippat pitsaasumik inuusinnaanerput / atugarissaarnissarput tigumminnaarsinnaajumallugu ajornanngippallu qaffassaavigisinnajumallugu. Minnerunngitsumillu suliffissaqartitsinissaq pisariqartipparput kinguaariit tullissagut pilersorsinnaajumallugit, taakkumi aamma utoqqalinersiaqalersussaassammata.

Atassutip tungaanit isumaqarpugut eqqarsaat ungasissuunngitsoq qanimut immikkuullarissumillu naalagaaffeqatigiiffiup iluani “nunaqqatigut” aningaasaateqarfimmik pilersitseqatiginiassallugit, soorlu nunap iluani attavilersuinikkut siuarsaanissamut, inuusutissarsiornernerup siuarsarnissaanut aammalu pisuussutinik uumaatsunik atuisinnaalernissamik suliaqarnernut atorpeqarsinnaasumik.

Nunammi suleqatigiissinneqarsinnaappata anguniakkat sukkanerusumik anguneqarsinnaassapput.



## ATASSUT INATSIARTUNI

---

Atassummit aningaasaateqarfiliorsinnaanermik qallunaat naalagaaffiannit soraarnersiutissanullu ileqqariviit aningaasaliisoralugit oqallissaaraluni siunnersuut tikilluaqquarput. Kisiannili isumaqarpugut siunnerfik taannaannaasariaqanngitsoq.

Atassummimmi isumaqarpugut aningaasaliinissamik isummersuut suleqatigiinnernik siammasinnerusunik imaqarsinnaasooq soorlu Kalaallit Nunaat nunanik allanik aningaasaliisinnaasunillu soorlu assersuutigalugu Nunani Avannarlerni ittunik aningaasaateqarfilioqatigiinnissamik kaammattuuteqarpat siunertaralugu Kalaallit Nunatsinni aatsitassanik atuisinnaalernissaq.

Nunarput Nunallu Avannarliit inoqatinik isiginnittaaseq aammalu kikkut tamat oqartussaaqataanerannik isiginnittaaserput eqqarsaatigalugit assigiimmik isiginneriaaseqarpugut aammalu pingaartitaralugit avatangiisit mianerinissaat aatsitassanillu atuinissaq. Kiisalu aamma inussutissarsiornermi sinaakkutit iluini isiginnittaaserput assigiippoq. Taamaattumik Atassutip tungaanit isumaqarpugut eqqarsaatit ungasissuunngitsoq nunatta nunanut avannarlernut suleqatiginnikkusunermik oqariartuuteqarsinnaanera.

Periarfissat pingajuattut taaneqarsinnaasoraarput aamma soorlu EUmik suleqateqarniarsinnaaneq Kalaallit Nunaanni aatsitassanik paaasinnaneq atuisinnaalernissarlu eqqarsaatigalugit. Nunarput EUlu aamma inoqatinik demokratiimillu isiginnittaasigut assigiipput, taamaattumik qanimut suleqatigiissinnaaneq uatsinnut EUmullumi aamma iluaqutaasumik pilersinneqarsinnaasorinarpoq.

Qulaani takuneqarsinnagunartut isumaqarpugut Kalaallit Nunaat nunarsuup sinneranut ammartariaqartoq suleqatigisinnaasanullu assigiinngitsunut assigiinngitsunillu siunertaqartunut aningaasaateqarfilioqatigiinnissamik kaammattuuteqarluni.

Taamatut oqaaseqarluta siunnesuutigiumavarput Naalakkersuisut 2016imi upernaakkut ataatsimiinissamut aningaasalersuinissamut pilersaarusiamik saqqummiussissasut pitsaannerusumik nunatsinni/nunatsinnut aningaasaliiumasinnaneq ikummarissarumallugu. Taamatullu pilersaarusiaq tikkuussilluni imaqartariqarpoq kikkut, suut qanorlu aningaasaqarnikkut suleqatigineqarsinnaasut.